



Московская Патриархия
УПРАВЛЕНИЕ ДЕЛАМИ

«20» 05 2015 г.

№ 01/2701

115191, Москва, Даниловский вал, 22
Тел.: (499) 578-03-55, факс: (499) 578-03-54
E-mail: udsekr@patriarchia.ru

Всем епархиальным Преосвященным

Сообщаю вам, что 5 мая 2015 года на очередном заседании Священного Синода Русской Православной Церкви был утвержден «Чин венчания супругов, в летех мнозех сущих» (журнал №29), разработанного комиссией Межсоборного Присутствия по вопросам богослужения и церковного искусства.

Данный чин предназначен преимущественно для благословения пожилых пар. Его использование оставляется на усмотрение священника, совершающего Таинство.

Прошу Вас обратить внимание клириков епархии на существование такого чина и распространить его текст по приходам. Текст «Чина венчания супругов, в летех мнозех сущих» прилагаю.

С любовью о воскресшем Господе,

управляющий делами
Московской Патриархии
митрополит Санкт-Петербургский и Ладужский

+ Варсонофий

ЧИН ВЕНЧАНИЯ СУПРУГОВ, В ЛЕТЕХ МНОЗЕХ СУЩИХ

Поставляется аналогий посреде церкви, и полагаются на нем Евангелие и Крест. Предстоят же в притворе: муж одесную, жена же ошуюю. Священник, облачен в фелонь, назнаменует главы супруг трижды, и дает им свечи возжженны. Также соединяет руце их, и входят во храм, поюще священнику псалом 127, сице:

Блажени вси боящиися Господа, ходящии в путех Его.

Людие же на кийждо стих глаголют: Слава Тебе, Боже наш, слава Тебе.

Труды плодов твоих снеси. Блажен еси, и добро тебе будет.

Жена твоя яко лоза плодовита, во странах дому твоего.

Сынове твои яко новосаждения масличная, окрест трапезы твоя.

Се тако благословится человек, бояйся Господа.

Благословит тя Господь от Сиона, и узриши благая Иерусалима вся дни живота твоего.

И узриши сыны сынов твоих: мир на Израиля.

Также глаголет священник слово вкратце.

По скончании же слова, вопрошает иерей мужа глаголя:

Имаши ли, *имярек*, произволение благое и непринужденное, и крепкую мысль, пребывати в законном браке с женою сею *имярек*, юже zde пред тобою видиши?

И отвещает муж, глаголя: Имам, честный отче.

Иерей паки: Не обещался ли еси иной жене?

Муж: Не обещахся, честный отче.

И абие иерей, зря к жене, вопрошает ю, глаголя:

Имаши ли произволение благое и непринужденное, и твердую мысль, пребывати в законном браке с мужем сим *имярек*, егоже пред тобою zde видиши?

И отвещает жена, глаголющи: Имам, честный отче.

Иерей паки: Не обещалася ли еси иному мужу?

И отвещает жена: Не обещахся, честный отче.

Также глаголет диакон: Благослови, Владыко.

И начинает иерей: Благословено Царство Отца, и Сына, и Святаго Духа, ныне и присно, и во веки веков.

Лик: Аминь.

И абие ектения: Миром Господу помолимся.

Лик: Господи, помилуй.

О свышнем мире и спасении душ наших, Господу помолимся.

О мире всего мира, благостоянии святых Божиих Церквей и соединении всех, Господу помолимся.

О святем храме сем и с верою, благоговением и страхом Божиим входящих вонь, Господу помолимся.

О великом господине и отце нашем, Святейшем Патриархе КИРИЛЛЕ, и о господине нашем, высокопреосвященнейшем митрополите [или: архиепископе, или: преосвященнейшем епископе] *имярек*, честнем пресвитерстве, во Христе диаконстве, о всем причте и людех, Господу помолимся.

О Богохранимей стране нашей, властех и воинстве ея, Господу помолимся.

О рабех Божиих, *имярек* и *имярек*, и о спасении их, Господу помолимся.

О еже благословитися браку сему, якоже в Кане Галилейстей, Господу помолимся.

О еже податися им целомудрию, Господу помолимся.

О еже возвеселитися им о сынех и дщерех, Господу помолимся.

О еже дароватися им незазорному пребыванию, Господу помолимся.

О еже даровати им же и нам вся ко спасению прошения, Господу помолимся.

О еже избавитися им же и нам от всякия скорби, гнева и нужды, Господу помолимся.

Заступи, спаси, помилуй и сохрани нас, Боже, Твоею благодатию.

Пресвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувше, сами себе и друг друга, и весь живот наш Христу Богу предадим.

Лик: Тебе, Господи.

Священник возгласно: Яко подобает Тебе всякая слава, честь и поклонение, Отцу, и Сыну, и Святому Духу, ныне и присно, и во веки веков.

Лик: Аминь.

Таже глаголет священник молитвы сия три велегласно. Или точною третью от сих, довлеет бо zde.

Молитва 1. Господу помолимся.

Лик: Господи, помилуй.

Боже Пречистый, и всея твари Содетелю, ребро праотца Адама за Твое человеколюбие в жену преобразивый, и благословивый я, и рекий: раститесь и множитесь, и обладайте землею, и обою ею един уд показавый сопряжением. Сего бо ради оставит человек отца своего и мать, и прилепится жене своей, и будета два в плоть едину, и яже Бог спряже, человек да не разлучает. Иже раба Твоего Авраама благословивый и разверзый ложесна Саррина, и отца множества языков сотворивый. Иже Исаака Ревекце даровавший, и рождество ея благословивый. Иже Иакова Рахиле сочетаваый, и из него дванадесять патриархов показавый. Иже Иосифа и Асенефу спрягий, плод детотворения им, Ефрема и Манассию даровавший. Иже Захарию и Елисавету приемый, и Предтечу рождение им показавый. Иже от корене Иессеова по плоти израстивый Приснодеву, и из Нея воплотивыйся, и родивыйся во спасение рода человеческого. Иже за неизреченный Твой дар и многую благодать пришедый в Кану Галилейскую и тамошний брак благословивый, да явиши, яко Твоя воля есть законное супружество, и еже из него чадотворение. Сам, Владыко Пресвятый, приими моление нас, рабов Твоих, якоже тамо, и zde пришед невидимым Твоим предстательством, благослови брак сей, и подаждь рабом Твоим сим, *имярек* и *имярек*, живот мирен, долгоденствие, целомудрие, друг ко другу любовь в союзе мира, семя долгожизненное, о чадех благодать, неувядаемый славы венец. Сподоби я видети чада чадов, ложе ея ненаветно соблюди, и даждь има от росы небесныя свыше, и от тука земнаго; исполни дома их пшеницы, вина и елеа и всякия благодости, да преподают и требующим, даруя купно и сущим с нима вся яже ко спасению прошения.

Яко Бог милости, и щедрот, и человеколюбия еси, и Тебе славу возсылаем, со Безначальным Твоим Отцем, и Пресвятым, и Благим, и Животворящим Твоим Духом, ныне и присно, и во веки веков.

Лик: Аминь.

Молитва 2. Господу помолимся.

Лик: Господи, помилуй.

Благословен еси, Господи Боже наш, Иже тайнаго и чистаго брака Священнодействию и телеснаго Законоположителю, нетления Хранителю, житейских благий Строителю. Сам и ныне, Владыко, в начале создавый человека и положивый его яко царя твари, и рекий: не добро быти человеку единому на земли, сотворим ему помощника по нему: и взял едино от ребр его, создал еси жену, юже видево Адам, рече: сия ныне кость от костей моих, и плоть от плоти моя: сия наречется жена, яко от мужа своего взята бысть сия. Сего ради оставит

человек отца своего и мать, и прилепится жене своей, и будета два в плоть едину: и яже Бог сопряже, человек да не разлучает. Сам и ныне, Владыко Господи Боже наш, низпосли благодать Твою Небесную на рабы Твоя сия, *имярек* и *имярек*, и даждь рабе сей во всем повиноватися мужу, и рабу Твоему сему быти во главу жены, яко да поживут по воли Твоей. Благослови я, Господи Боже наш, якоже благословил еси Авраама и Сарру. Благослови я, Господи Боже наш, якоже благословил еси Исаака и Ревекку. Благослови я, Господи Боже наш, якоже благословил еси Иакова, и вся патриархи. Благослови я, Господи Боже наш, якоже благословил еси Иосифа и Асенефу. Благослови я, Господи Боже наш, якоже благословил еси Моисея и Сепфору. Благослови я, Господи Боже наш, якоже благословил еси Иоакима и Анну. Благослови я, Господи Боже наш, якоже благословил еси Захарию и Елисавет. Сохрани я, Господи Боже наш, якоже сохранил еси Ноя в ковчезе. Сохрани я, Господи Боже наш, якоже сохранил еси Иону во чреве китове. Сохрани я, Господи Боже наш, якоже сохранил еси святых три отроки от огня, низпославый им росу с Небесе. И да приидет на ня радость она, юже имяше блаженная Елена, егда обрете Честный Крест. Помяни я, Господи Боже наш, якоже помянул еси Еноха, Сима, Илию. Помяни я, Господи Боже наш, якоже помянул еси святых Твоя сорок мученики, низпославый им с Небесе венцы. Помяни, Боже, и воспитавших их родители: зане молитвы родителей утверждают основания домов. Помяни, Господи Боже наш, рабы Твоя, пришедшия в радость сию. Помяни, Господи Боже наш, раба Твоего *имярек* и рабу Твою *имярек* и благослови я. Даждь им добродетель и единомыслие душ и телес, возвыси я яко кедр ливанский. Даруй им семя класяно, да всякое самодовольство имуще, изобилуют на всякое дело благое и Тебе благоугодное, и да узрят сыны сынов своих, яко новосаждения масличная окрест трапезы их. И благоугодивше пред Тобою, возсияют яко светила на небеси, в Тебе, Господе нашем.

С Тобою же слава, держава, честь и поклонение, Безначальному Твоему Отцу и Животворящему Твоему Духу, ныне и присно, и во веки веков.

Лик: Аминь.

Молитва 3. Господу помолимся.

Лик: Господи, помилуй.

Боже Святей, создавый от персти человека, и от ребра его воссоздавый жену, и спрягий ему помощника по нему, за еже тако годно бысть Твоему Величеству, не единому быти человеку на земли: Сам и ныне, Владыко, низпосли руку Твою от святого жилища Твоего, и сочетай раба Твоего сего, *имярек*, и рабу Твою сию, *имярек*, зане от Тебе сочетавается мужу жена. Сопрязи я в единомудрии и венчай я в плоть едину.

Яко Твоя держава и Твое есть царство, и сила, и слава, Отца, и Сына, и Святаго Духа, ныне и присно, и во веки веков.

Лик: Аминь.

И по аминь, прием священник венцы, венчает первое мужа, глаголя:

Венчается раб Божий *имярек* рабе Божией *имярек*, во имя Отца, и Сына, и Святаго Духа. Аминь.

Также венчает и жену, глаголя:

Венчается раба Божия *имярек* рабу Божию *имярек*, во имя Отца, и Сына, и Святаго Духа. Аминь.

Также благословляет я трижды, глаголя трижды: Господи

Боже наш, славою и честию венчай я.

И абие: Вонмем.

Мир всем.

Людие: И духови твоему.

Премудрость

Также прокимен Апостола, глас 8:

Положил еси на главах их венцы, от каменей честных, живота просиша у Тебе, и дал еси им.

Стих: Яко даси им благословение в век века, возвеселиши я радостию с лицом Твоим. Премудрость.

И чтец: Ко Ефесеем послания святого апостола Павла чтение.

И паки: Вонмем.

Апостол ко Ефесеем, зачало 230.

Братие, благодаряще всегда о всех, о имени Господа нашего Иисуса Христа, Богу и Отцу: повинующеся друг другу в страхе Божии. Жены, своим мужем повинуйтеся, якоже Господу: зане муж глава есть жены, якоже и Христос глава Церкви, и Той есть спаситель тела. Но якоже Церковь повинуется Христу, такожде и жены своим мужем во всем. Мужие, любите своя жены, якоже и Христос возлюбил Церковь, и Себе предаде за ню: да освятит ю, очистив банею водною в глаголе. Да представит ю Себе славну Церковь, не имущу скверны, или порока, или нечто от таковых, но да есть свята и непорочна. Тако должни суть мужие любить своя жены, яко своя тела: любяй бо свою жену, себе самого любит. Никтоже бо когда свою плоть возненавиде, но питает и греет ю, якоже и Господь Церковь: зане уди есмы тела Его, от плоти

Его, и от костей Его. Сего ради оставит человек отца своего и мать, и прилепится к жене своей, и будета два в плоть едину. Тайна сия велика есть: аз же глаголю во Христа и во Церковь. Обаче и вы по единому, кийждо свою жену сице да любит, якоже и себе, а жена да боится своего мужа.

Священник: Мир ти.

И чтец: И духови твоему.

Священник: Премудрость.

Аллилуиа, глас 5.

Стих: Ты, Господи, сохраниши ны и соблюдеши ны от рода сего, и во век.

Священник: Премудрость, прости, услышим святого Евангелия.

Мир всем.

Людие: И духови твоему.

Священник: От Иоанна святого Евангелиа чтение.

Лик: Слава Тебе, Господи, слава Тебе.

Вонмем.

Евангелие от Иоанна, зачало 6.

Во время оно, брак бысть в Кане Галилейстей, и бе Мати Иисусова ту. Зван же бысть Иисус и ученицы Его на брак. И не доставшу вино, глагола Мати Иисусова к Нему: вина не имут. Глагола Ей Иисус: что есть Мне и Тебе, жено? Не у прииде час Мой. Глагола Мати Его слугам: еже аще глаголет вам, сотворите. Беху же ту водоносы каменни шесть, лежаще по очищению иудейску, вмещающа по двема или трием мерам. Глагола им Иисус: наполните водоносы воды. И наполниша их до верха. И глагола им: почерпите ныне, и принесите архитриклинови. И принесоша. Якоже вкуси архитриклин вина бывшаго от воды, и не ведяше откуда есть: слуги же ведяху почерпшии воду, пригласи жениха архитриклин. И глагола ему: всяк человек прежде доброе вино полагает, и егда упиются, тогда худшее: ты же соблюл еси доброе вино доселе. Се сотвори начаток знамением Иисус в Кане Галилейстей, и яви славу Свою, и вероваша в Него ученицы Его.

Лик: Слава Тебе, Господи, слава Тебе.

Таже: Рцем вси от всея души, и от всего помышления нашего рцем.

Лик: Господи, помилуй.

Господи Вседержителю, Боже отец наших, молим Ти ся, услыши и помилуй.

Лик: Господи, помилуй.

Помилуй нас, Боже, по велицей милости Твоей, молим Ти ся, услыши и помилуй.

Лик: Господи, помилуй, *трижды.*

Еще молимся о милости, жизни, мире, здравии, спасении, посещении, прощении и оставлении грехов рабов Божиих, *имярек, и поминает ихже хочет: мужа, жену, чад их и прочая.*

Лик: Господи, помилуй, *трижды.*

Возглас от священника: Яко милостив и Человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

Лик: Аминь.

И глаголет велегласно священник. Господу помолимся.

Лик: Господи, помилуй.

Господи Боже наш, во спасительном Твоем смотре, сподобивый в Кане Галилейстей, честный показати брак Твоим пришествием: Сам ныне рабы Твоя, *имярек и имярек*, яже благоволил еси сочетаватися друг другу, в мире и единомыслии сохрани, честный их брак покажи, нескверное их ложе соблюди, непорочное их сожителство пребывати благоволи, и сподоби я в старости маститей достигнути, чистым сердцем делаяще заповеди Твоя.

Ты бо еси Бог наш, Бог еже миловати и спасати, и Тебе славу возсылаем, со Безначальным Твоим Отцем, и Всесвятым, и Благим, и Животворящим Твоим Духом, ныне и присно, и во веки веков.

Лик: Аминь.

Таже: Заступи, спаси, помилуй и сохрани нас, Боже, Твоею благодатию.

Лик: Господи, помилуй.

Дне всего совершенна, свята, мирна и безгрешна, у Господа просим.

Лик: Подай, Господи.

Ангела мирна, верна наставника, хранителя душ и телес наших, у Господа просим.

Прощения и оставления грехов и прегрешений наших, у Господа просим.

Добрых и полезных душам нашим, и мира миру, у Господа просим.

Прочее время живота нашего в мире и покаянии скончати, у Господа просим.

Христианския кончины живота нашего, безболезненны, непостыдны, мирны, и доброго ответа на Страшнем Судищи Христове просим.

Соединение веры и причастие Святаго Духа испросивше, сами себе, и друг друга, и весь живот наш Христу Богу предадим.

Лик: Тебе, Господи.

Священник возглашает: И сподоби нас, Владыко, со дерзновением, неосужденно смести призывати Тебе, Небеснаго Бога Отца, и глаголати:

И людие: Отче наш, Иже еси на Небесех, да святится имя Твое, да приидет Царствие Твое, да будет воля Твоя, яко на Небеси, и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Священник возглашает: Яко Твое есть царство, и сила, и слава, Отца, и Сына, и Святаго Духа, ныне и присно, и во веки веков.

Лик: Аминь.

И абие приносится общая чаша. Господу помолимся.

Лик: Господи, помилуй.

И благословляет священник общую чашу, и глаголет молитву сию:

Боже, вся сотворивый крепостию Твоею, и утвердивый вселенную, и украсивый венец всех сотворенных от Тебе, и чашу общую сию подаваяй сочетавшимся во общении брака, благослови благословением духовным.

Возгласно: Яко благословися Твое имя, и прославися Твое Царство, Отца, и Сына, и Святаго Духа, ныне и присно, и во веки веков.

Лик: Аминь.

Таже взем священник в руку общую чашу, преподает им трижды: первое мужу, и потом жене.

И абие прием я священник, куму или иному держащу создаи венцы, обращает яко образом круга. И поет священник, или людие, настоящия тропари:

Глас 5. Исаие, ликуй: Дева име во чреве и роди Сына Еммануила, Бога же и Человека, Восток имя Ему, Егоже величающе, Деву ублажаем.

Глас 7. Святии мученицы, добре страдальчествовавшии и венчавшиися, молитесь ко Господу, помиловаться душам нашим.

Слава Тебе, Христе Боже, апостолом похвало, мучеников радование, ихже проповедь: Троица Единосущная.

Таже священник, взем венцы мужа и жены осеняет ими брачующиеся.

И абие: Господу помолимся.

Лик: Господи, помилуй.

Священник молитву.

Боже, Боже наш, пришедый в Кану Галилейскую и тамошний брак благословивый, благослови и рабы Твоя сия, Твоим Промыслом ко общению брака сочетавшиеся: благослови их входы и исходы, умножи во благих живот их, восприими венцы их в Царствии Твоем, нескверны, и непорочны, и ненаветны соблюдай, во веки веков.

Лик: Аминь.

Священник: Мир всем.

Лик: И духови твоему.

Лик: Глаголю.
Главы ваша Господеви приклоните.

Лик: Тебе, Господи.

И благословляет я священник, глаголя:

Отец, Сын, и Святый Дух, Всесвятая, и Единосушная, и Живоначная Троица, едино Божество и Царство, да благословит вас, и да подаст вам долгожитие, преспеяние живота и веры, и да исполнит вас всех сущих на земли благих, да сподобит вас и обещанных благ восприятия, молитвами Святыя Богородицы и всех святых. Аминь.

Таже: Премудрость.

Пресвятая Богородице, спаси нас.

Лик: Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем.

Священник: Слава Тебе, Христе Боже, упование наше, слава Тебе.

Лик: Слава, и ныне: Господи, помилуй, трижды. Благослови.

Священник отпуст:

Иже в Кане Галилейстей пришествием Своим честен брак показавый, Христос, истинный Бог наш, молитвами Пречистыя Своея Матере, святых славных и всехвальных апостол, святых боговенчаных царей и равноапостолов Константина и Елены, святого великомученика Прокопия и всех святых, помилует и спасет нас, яко благ и Человеколюбец.

И поют многолетие, и поздравляют друг друга.